

元史新編

元史卷二十二

列傳八

開國四先鋒二部長

四先鋒曰哲伯曰忽必雷曰赫勒蔑曰速不台舊史惟速不台有傳

今采補哲伯傳其忽必雷赫勒蔑二人事蹟無攷二部長兀魯部朮赤台芒忽部畏塔爾也

速不台

速不台

一作雪不台舊史誤爲二人分立二傳今刪并之

蒙古部兀良罕氏其五

世祖闔里彌獵於斡難河上遇敦必乃汗相結納闔里彌

生孛忽都眾目爲折里麻漢言有謀略人也三世孫合赤

溫四世孫哈班生二子長忽魯渾次速不台俱驍勇善騎

射事太祖同飲班朱尼河水

舊史雪不台傳太祖初建典都于班朱尼河今龍居河也

哈班驅羣羊入貢遇盜見執二子隨至刺盜殺之眾潰遁

哈班遂以羊達行在由是父子兄弟以義勇稱忽魯渾以

百夫長從征乃蠻部戰長城南射卻其先鋒敗諸闕赤檀

山速不台以質子襲父職太祖七年攻金桓州先登下其城初帝已破蔑里吉部而其子率眾走西域其地在葱嶺以西險遠難取十一年帝會諸將於土兀刺河之黑林問計速不台請行乃選裨將阿里出領百人先行覘其虛實佯若挈家逃者蔑里吉不爲備十四年速不台軍至蟾河一戰禽其二將盡降其眾又追其部主霍都於欽察之玉峪敗之遂有其地十七年扈從征回回國其主蔑里汗委國而去速不台與哲伯追及於輝里河哲伯戰不利速不台駐軍河東命人爇三炬以張軍勢其王夜遁復命統兵萬人由不罕川必里罕城追之凡所經歷皆無水之地既度川先發游騎千繼以大軍晝夜兼行比至則蔑里汗已逃入海不月餘病死盡獲其帑藏以獻帝曰速不台枕干

血戰奏功萬里勞莫大焉選大珠銀罌賜之十八年速不  
台進討欽察遂引兵繞寬田吉思海展轉至大和嶺鑿石  
開道出其不意遇其酋長玉里吉及塔哈爾軍於布租河  
縱兵奮擊潰其眾獲玉里吉之子於林間餘眾悉降遂收  
其境又至阿里吉河敗斡羅思部略阿速部而還又奏以  
蔑里吉部乃滿部怯烈部及杭斤欽察諸部千戶通立一  
軍十九年略耶迷里霍只部獻馬萬匹二十年從征西夏  
度大磧攻下撒里畏吾特勒赤閔等部及德順鎮戎蘭會  
洮河諸州獻馬五千匹二十二年聞太祖崩乃還太宗立  
使尙公主屢攻潼關失利帝責之皇弟拖雷言兵家勝負  
不常請再令立功遂引兵從太弟營太宗三年大舉伐金  
渡河而南拖雷將兵渡漢水而北金將完顏合達帥步騎

數十萬待戰速不台從皇弟軍至牛頭關謀曰城居之人不耐勞苦數挑戰以勞之則可勝也乃以精騎數千尾金師之後更番迭戰師集鈞州三峯山金兵圍之數日將士頗懼會風雪大作金卒僵仆我師乘之斬殪殆盡河南諸州以次降金軍不能復振四年夏皇弟還軍官山畱速不台統諸道兵圍攻汴五年金主渡河北走衛州復南走歸德又走蔡州是秋汴降俘其后妃及寶器以獻冬圍蔡州六年春蔡州破金亡速不台以汴梁受兵日久歲饑縱其民北渡河就食七年太宗命諸王拔都再征欽察時欽察別推其族豪巴赤蠻爲主帝曰聞巴赤蠻有膽勇非速不台不可勝之遂命爲先鋒與巴赤蠻戰而大軍繼進虜之於寬田吉思海十三年從諸王拔都等討兀魯思部卽斡

羅思也自太祖班師後其國亦別推族豪耶烈班爲主諸王拔都爲其所敗圍徒里思哥城不克速不台選精銳五十人赴拔都軍一戰獲耶烈班三日克徒里思哥城盡取兀魯思所部而還進攻馬札部五道分進咸以敵軍勢盛未可輕進速不台計誘其軍至潮寧河諸王軍以上流水淺馬可涉且有橋下流水深速不台結棧下流潛渡繞出敵後未渡時諸王先涉河與戰軍士爭橋反爲所乘亡驍將銳士旣而速不台軍渡馳至馬茶城諸王亦至遂拔之而還諸王來會拔都曰潮寧河戰時速不台救遲速不台曰諸王惟知上流水淺且有橋遂渡而與戰不知此敵所必爭又不俟我下流結棧成而竝進此所以失計也是時北庭西域河南北關隴皆底定速不台功力居多初太祖

征西夏聞其久於行間敕還省親速不台曰君勞臣佚情所未安帝壯而聽之又金帥合達見獲不屈將死猶問速不台安在請一識之速不台出謂曰汝須與人耳識我何爲曰人臣各爲其主卿蓋天生英豪吾得一見死瞑目矣太宗崩後逾年諸王大會拔都欲不往速不台曰大王於族屬最長安得不往甲辰遂會於耶只里河立定宗還家土刺河上卒年七十三贈上柱國追封河南王諡忠定子兀良合台征大理交趾有功別有傳

哲伯

曷思麥里 布智爾

哲伯泰赤烏部人與太祖戰射中太祖頸創甚侍臣吮去壅血灌以湏乳始蘇翼日赤老溫之父以哲伯來降帝將殺之哲伯曰汗欲快射鉤之憾於匹夫邪抑將用壯士以

取天下邪吾誠得英雄主事之者高厓可以摧裂深水可以橫行太祖釋然曰汝之射我忠汝主也吾方經營天下肯伏壯士哉赦使從征奪回太祖幼子拖雷於塔爾仇部之手自是日見親信攻乃滿攻西夏戰輒冠軍遂與忽必雷速不台赭勒蔑號四先鋒而哲伯用兵尤出沒不測太祖五年金築烏沙堡以逼我帝命哲伯襲殺其眾遂略地而東六年大軍攻金哲伯請以金降臣耶律阿海爲鄉道金嚴兵居庸關哲伯回軍誘戰金兵來追襲哲伯伏兵山後回擊大敗之大軍繼至盡破契丹女眞之眾遂奪居庸七年太祖畱攻西京各城別遣哲伯攻東京不下佯解圍班師行六日遣人往諭而潛師隨其後每人兼馬晝夜倍道回襲東京克之八年復伐金攻居庸北口不克帝乃命



哲伯同速不台自關左閒道攻居庸南口破之出北口與

大軍會十四年太祖征西域命哲伯前驅速不台繼之脫

忽察爾又繼之令直踰葱嶺趨王城待大軍至夾攻前後

以上本元秘史哲伯渡乞則里巴海劉郁西使記過龍骨河復西

有河西注滙爲海約千有餘里攻鐵山衣幟與敵軍不相

日乞則里巴海云云當在伊犁辨乃焚蒿爲號烟焰漫野敵軍動乘之斬首三萬級踰雪

嶺西北見郭寶玉傳遂以西遼降將曷思麥里爲先鋒鄉道大

軍攻斬其酋屈出律卽乃滿太陽汗之子奔西遼篡立者

也持其首東徇各部若可什哈爾城押爾牽城斡端城尼

沙布爾城皆望風降附既而帝親軍至尋思千城哲伯敗

回回主札刺丁於月戀戀舊諺作赤心二字月戀揭赤之譯音揭赤之

地追襲之又連敗諸阿刺黑城於圖馬溫山於慈顏城札

刺丁走欽察國海中盡下各城收其珍寶而還帝命疾馳  
進討欽察哲伯乃遣軍分招旁近各城悉下惟塔爾只部  
阿速部以兵拒戰皆破之進擊斡羅思於鐵爾山獲其國  
主密吉思臘獻諸朮赤太子誅之尋征欽察別部康里國  
敗其主霍脫思汗之軍進平欽察橫行數萬里疾如飄風  
威震西海與速不台相等師還哲伯卒於軍時帝方征河  
西親勞軍於阿刺思受所獲西域各國珍寶及七寶繳願  
羣臣曰惜哲伯不及飲凱還酒也太宗八年以平金後中  
原諸州民戶分賜諸勳戚哲伯子孫於東平府戶內撥賜  
子孫官爵無攷與哲伯同列先鋒者尙有忽必雷赭勒蔑  
二人戰功亦不見於史哲伯裨將從征有功者一曰曷思  
麥里西遼谷則部人短小精悍仕西遼爲闕爾罕近侍主

谷則行帳爲可散城長官會西遼爲乃滿太陽汗子屈出律所篡各部不服大將哲伯奉太祖命西征曷思麥里以可散城迎降請爲鄉道哲伯知其可用奏爲先鋒曷思麥里習西域形勢大軍無畱行及平西遼康里阿速斡羅思欽察諸國班師哲伯已卒曷思麥里見太祖於河西太祖曰哲伯嘗稱汝軀幹小而聲聞甚大命以所進金寶隨其力所勝悉賜之授必闍赤常侍左右領所招士卒從征河西又從太宗征金領懷孟奧魯事授懷州達魯花赤佩金符敗金兵於懷州降金總帥范眞軍民萬餘十一年六月帝以其從軍西域宣力有年命二子分襲其職而令曷思麥里以札魯忽赤歸老西域大帥察罕行省帖木迭爾奏畱之帝允其請庚子進河北河南二十八處都達魯花赤

乙卯五月卒次子密里吉復爲懷孟達魯花赤中統二年

從攻淮西與宋戰死

以上見舊史本傳今分其前半入哲伯傳而以後半附傳末

一曰

布智爾蒙古脫脫里台氏父紐爾傑身長八尺有力善騎

射善造弓失道逢太祖前鋒哲伯

舊史作別那顏蓋哲伯一作闊別而那顏其號

也

邀與俱見太祖視其所挾弓矢甚良詢知自造適有雙

兔翔於前一射獲之并以二矢獻哲伯隨至其帳奇其子

布智爾之貌許妻以女遂父子俱事太祖嘗從征討賜號

拔都從征回回斡羅思等國布智爾輒陷陳身中數矢流

血滿體悶仆幾絕太祖命剗牛腹納布智爾浸熱血中逾

時乃甦憲宗時爲大都行天下諸路耶可札魯忽赤賜蔚

州定安爲食邑子四人長好禮從征宋督水軍攻襄樊渡

江入臨安以功授水軍翼萬戶府達魯花赤

舊史哲伯無傳散見本紀

及列傳中或作柘柏或作闕別或作鷓博或作緒宇或作  
遮別或作者必那顏或作折不那演或作折那顏舊史不  
知其爲一人遂至無傳今刺取舊史各傳及元祕史並以  
其部下裨將曷思麥里布智爾二傳附之蓋哲伯其本名  
那演則其號猶之曰的斤  
日海牙曰拔都之類也

朮赤台

朮赤台兀魯氏其先世刺真拔都以材武雄諸部生子曰  
兀魯曰芒忽與札刺爾弘吉刺亦乞列思等五人當開  
之先戰功最著太祖命其子孫各以名爲氏號五投下朔  
方既定舉六十五人爲千夫長兀魯之孫曰朮赤台其一  
也朮赤台有膽略善騎射勇冠一時初克烈部王罕之子  
鮮昆梟雄忌太祖威名潛約亦哈刺部哈真部沙陀部來  
侵時兀魯及芒忽兩軍徵調未集我軍倉卒戰不利及兩  
軍至太祖急遣拒敵芒忽部先進朮赤台繼之單騎陷陳

射殺鮮昆遂并有克烈之地乃滿部蔑爾吉部謀合兵來  
侵諸部多陰附之者不虞太祖領兵猝至諸部潰去乘勝  
敗之朮赤台俘其帥札哈堅普與盟而歸之未幾復叛朮  
赤台以計襲殺札哈堅普遂平其國朮赤台從太祖起兵  
歷平漠北長驅西域歷班真海子閒關萬里與哲伯速不  
台皆爲先鋒每戰必冠軍太祖卽位幹難河大封功臣謂  
曰爾統勁旅破王罕父子之軍朕恃汝如高山遮護可世  
統兀魯部四千戶世世無替竝賜以王罕姪女之爲太祖  
夫人者子徹台材武過人自太宗及世祖歷事四朝以勞  
封德清郡王賜金印丙申賜德州戶二萬爲食邑至元十  
八年增食邑二萬一千戶肇慶路連州德州泊屬邑俱隸  
焉徹台卒子端真襲爵爲郡王太宗時與亦剌哈台戰勝

帝卽以亦刺哈妻賜之世祖之征阿里不哥也徹台子哈  
荅與忽都忽踦請曰臣父祖世以甲馬事先朝今王師北  
征臣等幸少壯願如先世以力戰報國旣得請於是與阿  
里不哥戰於石木溫都之地諸王哈丹駙馬臘眞與兀魯  
芒忽居右諸王塔察爾及太丑台居左合必赤將中軍兵  
始交獲其將合丹斬之外刺之軍遂敗衄又戰於失烈延  
塔兀之地當帝前鏖戰至日晡勝之帝賜以黃金將佐吏  
卒行賞各有差又從討李壇有功哈荅子脫歡亦嘗從諸  
王徹徹都討只爾火台獲之又嘗破失烈吉要木忽爾之  
兵而脫歡弟慶童亦從征乃顏力戰徹台子二孫三曾孫  
二玄孫一此九人皆世郡王封

畏荅爾

畏答爾芒忽部人與兀魯部同出刺真拔都拔都有二子  
一名兀魯一名芒忽爾始兀魯氏芒忽氏皆隸泰赤烏後  
歸太祖二部兵皆善戰其旗纛一花一黑雖攪殺萬眾中  
不亂名聞諸部太祖以畏答爾兄尙畱事泰赤烏疑畏答  
爾貳心畏答爾折矢自誓曰所不終事主者有如此矢太  
祖察其誠更名薛禪按達薛禪言聰明按達言至交也太  
祖與克烈部王罕對陳於哈刺真時敵兵強盛我兵惟兀  
魯部芒忽部取銳而芒忽軍少於兀魯一倍帝命兀魯軍  
四千先發其將朮赤台橫鞭馬鬣不應時畏答爾率芒忽  
一軍奮然曰我猶鑿也諸君斧也鑿非斧不入我請先入  
諸軍繼之萬一不還有三黃頭兒在唯上念之遂率所部  
千餘先出陷陳大敗之至晡時猶追不已敕使止之乃還



腦中流矢創甚帝親傅以善藥畱處帳中月餘卒帝深惜之及王罕滅帝以其將只里吉實抗畏荅爾乃分只里吉實民百戶隸其子且使世世歲賜不絕仍令收完芒忽人民之散亡者太宗思其功復以北方萬戶封其子芒哥爲郡王金亡後太宗命忽都虎大料漢民分城邑以封功臣授芒哥泰安州民萬戶帝訝其少忽都虎曰臣今差次惟視舊數多寡芒哥舊封纔八百戶帝曰不然畏荅爾封戶雖少戰功則多其增封爲二萬戶與十功臣爲諸侯者同

十功臣者四怯薛四先鋒及兀魯芒忽二部長也

兀魯部長徹台爭曰芒哥舊兵

不及臣之半今封願多於臣帝曰汝忘而先橫鞭馬鬣時邪徹台遂不敢言芒哥卒孫六人俱襲封郡王芒哥弟蘸木曷之孫博羅歡別封泰安王平宋及征叛藩立功自有

傳畏苔爾傳全本  
姚樞神道碑



元史卷二十三

誓渾河功臣

方太祖爲合罕時

父子才攻敵勢強盛勝

負未卜乃飲班朱尼河水以誓眾

舊史或作班朱尼河或作辨屯河或作班真河

或作黑河或作渾河元秘史作巴勒渚海子

凡與飲此水者十有九人謂之飲

渾河功臣言曾共艱難也舊史散見各傳計除四傑四先

鋒外

元史述四傑事惟博爾忽今可攷者十五人除博爾

忽及駙馬孛圖及速不台三人各別傳外今此十二人或

專傳或散見子孫傳中爲類敘於左

札巴爾

舊作札八兒火者賽夷人賽夷西域之部長也因以爲氏

其官曰火者

今日和卓部

札巴爾長身美髯方瞳廣額雄

勇善騎射初謁太祖於軍中一見異之太祖與克烈部王

罕有隙一夕王罕父子潛師來襲我軍倉卒大潰太祖引去從行者僅十九人札巴爾與焉至班朱尼河餓糧俱盡荒野無所得食會一野馬北來諸王哈撒爾射殪之刳革爲釜出火於石汲河水烹而啖之太祖額手仰天誓曰使我克定大業倘不與諸人同甘苦者有如河水將士莫不感泣王罕旣滅西域諸部次第平乃遣札巴爾使金周覽險要歸報太祖遂興師攻金克山後州郡將攻燕都金守居庸之塞治鐵網關門布鐵蒺藜百餘里守以精銳我師距關百里不能前太祖召札巴爾問計對曰從此而北黑樹林中有閒道可通一騎臣屢嘗過之若勒兵銜枚以出終夕可至請輕騎前導日暮入谷黎明諸軍已在平地疾趨南口鉦鼓若自天下金人猶睡未知也比驚起已莫能

支關既破中都大震已而金人遷汴太祖覽中都山川形勢顧謂左右近臣曰朕得至此者札巴爾力也乃令札巴爾於城中引弓射之四面隨箭所落地悉以輿之乘輿北歸與諸將畱守中都授黃河以北鐵門以南天下都達魯花赤賜養老百姓并四王府爲居第札巴爾每戰被重甲舞槊陷陳馳突如飛嘗乘橐駝以戰眾莫能當有丘真人者有道之士也隱居勞山中太祖聞其名命札巴爾往聘之丘語札巴爾曰我嘗識公札巴爾曰我亦嘗見真人他日偶坐問札巴爾曰公欲極一身貴顯乎欲子孫蕃衍乎札巴爾曰百歲之後富貴何在有子孫以承宗祀足矣丘曰聞命矣後卒年百一十有八追封涼國公諡武定二子阿里罕明里察阿里罕早從父出入行陳勇而善謀憲宗

伐蜀爲天下質子兵馬都元帥生哈只終湖南宣慰使追封涼國公諡安惠哈只生陝西行省平章政事養安大府監丞阿思蘭太僕寺丞補孛養安生太僕寺卿阿巴寶明里察追封涼國公諡康懿生戶部尙書亦不刺金陝西行省參知政事哈刺

鎮海者怯烈台氏初以軍伍長從太祖同飲班朱尼河水賜珍珠旗佩金虎符爲闔里必從征塔塔爾欽察西夏西契丹女真河西諸國所俘生口萬計命屯田於阿魯歡立鎮海城戍守之壬申從太祖略定漠南地師次隆興與金將忽察虎戰矢中臆閒裹瘡復出戰者數四軍聲爲大振旣破燕太祖命於城中環射四矢凡矢所至圍池邸舍悉以賜之尋拜中書右丞相己丑太宗卽位扈從至西京攻

河中河南鈞州癸巳攻蔡州以功賜恩州千戶先是收天下童男童女及工匠置局弘州旣而得西域織金綺紋工三百餘戶及汴京織毛褐工三百戶皆分隸弘州命鎮海世掌焉定宗卽位以鎮海爲先朝舊臣仍拜中書右丞相卒年八十四子十人勃古思從世祖征花馬大理有功累官終保定路達魯花赤

耶律阿海遼之故族也父祖皆仕金阿海善騎射通諸國語金季選使王罕見太祖姿貌異常陰歸心焉明年復出使與弟圖花俱往遂以圖花爲質直宿衛阿海參預機謀出入戰陳常在左右歲壬戌王罕叛盟謀襲太祖時與飲辨屯河水旣敗王罕金人誚其使久不還拘家屬於瀛阿海殊不介意攻戰愈厲帝聞之妻以貴臣之女給戶俾食



其賦癸亥冬進攻西夏諸國累有功丙寅帝建龍旂卽大位敕左帥哲伯略地漠南以阿海爲先鋒辛未破烏沙堡鏖戰宣平大捷滄河遂出居庸耀兵燕北癸酉拔宣德德興乘勝次居庸北口哲伯攻下紫荆關阿海奏曰好生聖人之大德興勑之始願止殺掠以應天心帝嘉納之遂分兵略燕南山東諸郡還駐燕之近郊金主懼請和帝諭其使令歸阿海妻子卽送來歸師還出塞甲戌金人走汴阿海以功拜太師行中書省事命圖花從木華黎取中原阿海從帝攻西域俘其酋長只闌圖下蒲華等城畱監尋斯千城卒於軍年七十三至元十年追封忠武公子孫皆貴顯有戰功

懷都者蒙古怯烈氏世傳李唐外族事太祖嘗從飲班朮

尼河水戰功爵位無攷子速哥以質直謀勇受太宗知命使金覘虛實語之曰卽不還子孫無憂不富貴也速哥頓首曰臣死職耳奉陛下威命以行可無慮帝悅賜所常御馬至河金人閉之舟中七日始登南岸又三旬乃達汴及見金主謂曰天子念爾土地日狹民力日疲故遣我致命爾能共修歲幣通好不絕則可轉禍爲福謁者令下拜速哥曰我大國使爲爾屈乎金主壯之取金卮飲之酒曰歸語汝主必欲加兵敢率精銳以相周旋歲幣非所聞也速哥飲畢卽懷金卮以出默識其地理隄塞城郭人民之強弱旣復命備以虛實告且以所懷金卮獻帝喜曰我得金於汝手中矣復以賜之始下令徵兵南伐兵至河北岸方舟欲渡金軍陳於河南帝令儀衛導速哥居中行親率偏

師乘陳西策馬涉河會睿宗軍亦由襄鄧至兩軍夾攻之及金亡詔賜金護駕士五人曰此以旌汝不辱使命也前使過崞州崞人盜殺其良馬至是兼以崞民賜之歲乙未帝將官速哥令西域中原聽自擇之速哥再拜以中原請帝曰西山之境八達嶺以北汝其主之汝於城中構大樓居其上使人皆仰望汝汝俯而諭之願不偉乎乃以爲山西大達魯花赤受命方出有回回六人訟事不實將抵罪遇諸塗急止監者緩其刑復入奏曰此六人者名著西域徒以小罪盡誅之恐非所以懷遠願以賜臣臣得抑辱之使自悔悟遷善爲他日用帝意釋召至雲中皆釋之後有至大官者卒年六十二追封宣寧王諡忠襄子六人前三子皆從兀魯赤大王出征次四子忽蘭之母以后戚故得

襲職前賜崞州戶籍已抄入官更賜山西三百戶卒贈雲

國公諡康忠子天德于思襲爵卒贈太傅諡顯毅

舊史懷都載其

于速哥傳今以飲渾河功臣爲主故以子附父

雪裏堅那顏者徹兀台氏從太祖與王罕戰同飲班真河

水以功授千戶領徹里台部征討諸國卒於河西子麥吉

從太宗定中原孫麥里從皇子貴由平欽察阿速斡魯思

諸國從憲宗伐宋有功世祖卽位擊叛王霍忽於河西一

月八戰奪其所掠諸部民以還弟桑忽荅戰死於陳詔遣

使者以銀鈔羊馬迎致麥里賜號荅刺罕

舊史雪裏堅那顏載其孫麥里

傳今以飲渾河功臣爲主故以孫附祖

塔海舊傳連拔都爾號者遜都思部人驍勇善戰從太祖同飲黑河

水以功爲千戶子卜花襲職卒孫阿塔海從太師兀良合

台征雲南師還事世祖於潛邸至元九年命馳驛督諸軍  
攻襄陽築正陽東西城敗宋將夏貴舟師復渡江與丞相  
伯顏軍合克池州次建康下鎮江敗宋揚州守將李庭芝  
之師與宋將張世傑孫虎臣戰江中焦山下十五年召赴  
闕拜行中書省左丞相移治臨安二十年遷征東行省丞  
相征日本遇風舟壞喪師十七八二十四年扈從征乃顏  
二十六年卒年五十六追封順昌郡王諡武敏子阿里麻  
累官南臺御史大夫舊史塔海在其孫阿塔海傳今以  
飲渾河功臣爲主故以孫附祖  
忽魯渾者兀里養哈台氏其先祖折里麻生合赤溫合赤  
溫生哈班哈班子二人曰忽魯渾曰速不台俱以驍勇善  
射事太祖父子兄弟三人與飲班朮尼河之水速不台別  
有傳哈班遇盜槍將及爲忽魯渾反鋒所刺人馬俱踏又

嘗從太祖拒乃滿追兵於長城之南忽魯渾射卻其渠帥  
餘眾夜自驚潰中原既定方論功行賞不及祿而卒忽魯  
渾生子哈丹爲太宗正府耶可札魯忽赤哈丹生子耶速  
台至元十一年隨其從兄阿朮伐宋濟江薄揚州無戰不  
在行閒屢轉至淮東道宣慰使奉省檄馳報邊事入對便  
殿出奏牘於懷上召近臣進讀而左右適無通漢文者耶  
速台拜請自誦其文而釋以譯語音吐明暢辭旨精工上  
悅令縱橫行殿上而默察之知爲偉器諭宰臣俾與其政  
遂以參議中書省事明年丞相安童秉政亦奏言耶速台  
兼通蒙漢語言文字可大用卽日命爲中書參政二十四  
年拜尙書平章政事從征乃顏給餉運籌復與諸將畱兵  
討其餘黨金家奴塔不台悉勘定乃還二十七年武平地

大震姦人乘災異相煽搖藩王多爲乃顏所惑耶速台奉命引兵五百人往撫定之禱山川調租弛稅發鈔振米斬乘時爲盜者收三藩王鞫之始皆倔強徐諭以禍福乃皆伏奏徙遼陽行省驛道由高州以北至上都減去五驛既還政府列上丞相桑葛罪狀與侍從近臣會斥其姦桑葛及同惡皆誅死益爲上所親信成宗時拜江浙行省平章卒黃潛碑其神道

阿朮魯幹魯納台氏與太祖同飲黑河水屢從征討賜銀印總大軍伐遼東女真諸部復帥師討西夏大戰於合刺合察禽夏主太祖命盡賜以夏主遺物繼總軍南伐金拔信安下宿泗等州年老子不花襲職不花卒子幼以兄子懷都繼領其職從討李壇圍濟南從征襄陽渡漢江破宋

水軍斬千餘級從張弘範徇溫州福建屢有功

舊史阿朮魯載其孫

懷都傳又重出阿朮魯傳今并入以飲渾河功臣爲主而以孫附祖

耶律圖花者契丹人世居桓州太祖時率眾來歸大軍入金境爲鄉道獲所牧馬甚眾後從太祖同飲班朮河水從伐金大破忽察虎軍又從木華黎收山東河北有功封濮國公賜虎符銀印統萬戶札刺爾劉巖史天澤伐金卒於西和州子孫從征蜀征南蠻緬交趾有戰功此皆舊史所載渾河同誓功臣見於列傳者又有哈散納者怯烈氏太祖時從征王罕誓渾河後從征西域下薛迷思干不花刺等城至太宗時仍命領阿爾渾軍回回人匠三千戶駐葷麻林尋授平陽大原兩路達魯花赤兼管諸色人匠子孫世襲千戶又有紹古爾者麥里吉台氏扈從太祖親征誓



渾河已而從破信安略地河西復從太宗伐金破河南孫忽都虎於世祖時從攻鄂從征李璫復奉詔征占城又從征交趾皆有功

論曰誓飲渾河十九功臣未必盡雲蒸龍變之材也而滹沱河麥飯蕪羹亭豆粥固勝前代烏盡功藏者萬萬今可攷者十五人尙缺四人殆四傑四先鋒之徒歟外此尙有太祖武臣無赫赫之功不在盟府之列而攀鱗附翼舊史專傳者今附其姓名於後曰鈔兀爾者召烈台氏先泄札木合之謀於太祖及戰勝賜荅刺罕號子孫世襲耶可札魯花赤曰鈔爾者別速氏從太祖收服諸國有功子孫從征金征宋征大理諸國凡四世皆歿於陳曰鈔思者又號荅祿乃滿部太陽汗之曾孫屈出律之孫也國破後幼歸

太祖長從征伐從太宗睿宗伐金先登陷陳授萬戶子別  
的因善騎射事世祖以政績顯其孫及曾孫遂讀書登進  
士科曰阿刺瓦思者回鶻人率部曲降於太祖從征瀚海  
輪臺高昌于闐尋斯千各部靡戰不克歿於軍其曾孫布  
伯原作以騎射被寵過於成宗武宗仁宗前後賜楮幣餘  
四十萬緡他物稱是故曰亡國之英豪不若興王之卒伍  
雖有良舟不如駛流信矣哉

元史卷二十三

列傳

八

元史卷二十三終

元史卷二十四

列傳十

開國武臣

察罕益德

亦力撒合

立智理威

察罕初名益德西夏人唐兀烏密氏父曲耶怯律仕夏其妾生察罕不容於嫡母以配掌羊羣者察罕稍長其母以告且曰嫡母已有弟矣可聽汝所之察罕豪武過人幼牧羊於野植杖於地置帽杖端跪拜歌舞太祖出獵見而問之察罕對曰獨行則帽尊二人行則年長者尊今獨行故致敬於帽且聞有大官至先習禮儀耳帝異之乃挈以歸屬光獻皇后養之命給事內廷及長賜姓蒙古妻以宮人弘吉刺氏嘗行困脫鞵藉草而寢鴉鳴其旁心惡之擲鞵擊之蛇墜鞵中歸以其事聞帝曰是禽人所惡者在爾則

爲喜神宐戒子孫勿害其類從帝略雲中桑乾金將定辭擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功爲御帳前首千戶從帝征西域孛哈里城薛迷思干城回回國主札刺丁拒守鐵門關兵不得進察罕先驅開道斬其將餘眾悉降又從攻西夏破肅州師次甘州察罕父曲耶怯律居守城中察罕射書招之且求見其弟時弟年十三命登城於高處見之且遣使諭城中使早降其副阿綽等三十六人合謀殺曲耶怯律父子并殺使者併力拒守城破帝欲盡坑之察罕言百姓無辜止罪三十六人進攻靈州夏人以十萬眾赴援帝親戰敗之還次六盤夏主堅守中興帝遣察罕入城諭以禍福眾方議降會帝崩諸將

禽夏主殺之復議屠中興察罕力諫止之馳入安集遺民  
太宗卽位從略河南北還清水荅蘭荅巴之地賜馬三百  
珠衣金帶鞍勒皇子闕出伐宋命察罕爲斥候又從親王  
叩溫不花南伐歲乙未克棗陽及光化軍未幾召叩溫不  
花赴行在以全軍付察罕丁酉復與叩溫不花進克光州  
戊戌授馬步軍都元帥率諸翼軍攻拔天長縣及滁壽泗  
等州定宗卽位命拓江淮地憲宗卽位召見以都元帥兼  
領尙書省事賜汴梁歸德河南懷孟曹濮太原三千餘戶  
爲食邑及諸處草地合萬四千五百餘頃戶二萬餘乙卯  
卒封河南王謚武宣子十人長木花里事憲宗直宿衛從  
攻釣魚山有功世祖至元四年攻宋自江陵略地回至安  
陽灘敗宋兵救都元帥阿朮于墜馬危急之時賜金虎符

爲蒙古軍萬戶復攻襄樊卒于軍追封梁國公諡武毅亦力撒合察罕從孫也至元十年擇貴族子備宿衛召亦力撒合至闕下以爲速古爾赤掌服御事甚見親幸時訪以政事稱曰秀才而不名嘗奉使河西還奏諸王只必帖木爾用官太濫擢河東按察使逐平陽路達魯花赤之貪墨者召還賜黃金百兩銀五百兩以旌其直進南臺中丞帝出內中寶刀賜之曰以鎮外臺時丞相阿合馬之子忽辛爲江浙行省平章恃勢貪穢亦力撒合發其姦得贓鈔八十一萬錠奏誅之并劾江淮釋教摠攝楊璉眞珈諸不法事諸道竦動二十一年改北京宣慰使察諸王乃顏有異志密請備之二十三年罷宣慰司立遼陽行省以爲參政已而乃顏果反帝自將征之掌運糧儲軍供無乏二十

七年命尚諸王筭吉女親爲資裝遣之改四川行省左丞  
成宗元貞元年卒弟立智理威

立智理威爲太子眞金東宮必闡赤掌文書至元十八年  
蜀初定帝閔其地久受兵百姓傷殘以立智理威爲嘉定  
路達魯花赤以闡田均賦弭盜息訟諸事課守令會盜起  
雲南號數十萬聲寇成都立智理威馳入告急言辭懇切  
繼以泣涕大臣疑其不然帝曰雲南朕所經理未可忽也  
乃推食賜之又語之曰南人生長亂離豈不厭兵畏禍邪  
御之乖方故爲亂耳歸告諸將叛則討之服則撫之毋多  
殺以傷生意立智理威至蜀宣布德意民果安之後遷刑  
部尚書有小吏誣告漕臣劉獻盜倉粟宰相桑葛方事聚  
斂鍛煉杜服立智理威曰刑部天下持平今輦轂之下漕



臣以冤死何以正四方卽以實聞以是忤丞相出爲江東道宣慰使爲政嚴明豪民猾吏縮手不敢犯然亦無所刑戮而治元貞二年遷四川行省參政屢平反冤獄大德三年以參知政事宣慰荆湖荆湖公田病民爲甚部內實無田隨民所輸租取之戶無大小皆出公田租雖水旱不免立智理威問民所不便十數事上於朝而言公田尤切朝議遣使理之旋詔凡官無公田者始隨奉給之民力少蘇七年再遷四川行省參政八年進左丞雲南王入朝所在以驛騎縱獵立智理威曰驛騎所以傳命令事非有急且不得馳沉獵乎王憚爲之止獵蜀人饑親勸分以振之買地給葬且修寬政部內以治十年改湖廣行省左丞湖廣歲織幣上供以省臣領工作遣使買絲他郡多爲奸利工

官又爲刻剝故匠戶日貧造幣益惡立智理威不遣使令  
工視賈人有藏絲者擇買之工不告病歲省費數萬貫他  
郡推用之皆便至大三年卒年五十有七諡忠惠封秦國  
公子二人長買訥翰林學士承旨次韓嘉訥御史大夫孫  
達理麻內府宰相

郭寶玉

子德海

孫侃

太祖征西域之功以郭寶玉父子爲取盛唐中書令子儀  
之裔也世居華州鄭縣寶玉通天文兵法善騎射金末封  
汾陽郡公兼猛安引軍屯定州歲庚午童謠曰搖搖罟罟  
至河南拜闕氏旣而太白經天寶玉嘆曰北軍南汴梁卽  
降天改姓矣金人以獨吉思忠僕散揆行中書省領兵築  
烏沙堡會太師木華黎軍忽至敗其兵三十餘萬思忠等

走寶玉舉軍降木華黎引見太祖問取中原取西域孰先  
寶玉對曰中原勢大不易取西域諸蕃士馬勇悍可先取  
之藉以圖金又言建國之初宜頒新令於是命頒條畫五  
章如出軍不得妄殺刑獄惟重罪處死其餘雜犯量情笞  
決軍戶蒙古色目人每丁起一卒漢人有田四頃人三丁  
者僉一卒年十五以上成丁六十破老站戶與軍戶同民  
匠限地一頃僧道無益於國有損於民者悉禁止之類皆  
寶玉所陳也帝將伐西域患其城多依山險問寶玉攻取  
之策對曰使其城在天上則不可取如不在天上至卽取  
矣帝壯之授抄馬都鎮撫癸酉從木華黎取永清破高州  
降北京龍山復帥抄馬從錦州出燕南破太原平陽諸州  
縣甲戌從帝討契丹遺族歷古徐鬼國訛夷朵等城破其

兵三十餘萬寶玉胷中流矢帝命剖牛腹置其中少頃乃蘇尋復戰收別什巴里別什蘭等城次忽章河西人列兩陳迎拒戰方酣寶玉望其眾疾呼曰西陳走矣其兵果走追殺幾盡進兵下尋思千城次暗木河敵築十餘壘陳船河中俄風濤暴起寶玉令發火箭射其船一時延燒乘勝直前破護岸兵五萬斬其大將佐里遂屠諸壘收馬里四城辛巳西域可弗義國唯算端罕者乘大軍之歸襲破西契丹故國據尋思千城聞帝將至棄城南走入鐵門屯大雪山寶玉追之遂奔印度帝駐大雪山前寶玉請封山川神後從哲伯速不台二先鋒收契丹渤海等諸國有功累遷斷事官卒於賀蘭山子德海

德海資貌奇偉亦通天文兵法金末爲謀克擊宋將彭義

斌於山東敗之知父寶玉北降遁入太行山大軍至乃出降爲抄馬彈壓從先鋒哲伯西征渡乞則里八海攻鐵山衣幟與敵軍不相辨乃焚蒿爲號煙焰漫野敵軍動乘之斬首三萬級踰雪嶺西北萬里進軍次荅里國悉平之乙酉還至崢山吐蕃帥尼倫回紇帥阿必丁反復破斬之戊子春皇子拖雷監國從元帥闊闊出游騎入關中金人閉關拒守德海引驍騎五百斬關入殺守者三百人直擣凌風渡寨後兵不至引還太宗元年己丑破南山八十三寨陝西平德海導大將魁玉那假道漢中歷荆襄而東與金將武僊軍十萬遇於白河德海提孤軍轉戰僊敗走斬首二萬餘級復破金伊刺粘哥軍於鄧冬十一月至鈞州辛卯春正月皇弟拖雷軍由洛陽來會於三峯山金人掘塹

圍我軍皇弟令軍中祈雪又灼羊骨卜得吉兆夜大雪深三尺敵軍僵立刀架凍不能舉我軍衝圍出塹金兵死者三十餘萬其帥完顏合達伊刺蒲阿走匿浮圖上德海命掘浮圖基出其柱而焚之完顏斜烈單騎遁還洛陽又破金將合喜兵於中牟完顏斜烈復帥軍十萬來拒戰於鄭先登破之殺其都尉左崇以功遷右監軍壬辰正月破金兵黃龍岡明年取申唐二州河南復叛德海往討之礮傷其足歸卒德海通知政事先是太宗詔大臣忽都虎等試天下僧尼道士選精通經文者千人有能工藝者則命小通事合住等領之餘皆爲民又詔天下置學廩育人材立科目選之入仕皆從德海之請也子侃

侃字仲和幼爲丞相史天澤所器重畱於家而教養之弱

冠爲百戶鷲勇有謀壬辰金將白撒復取衛州侃拒之破其兵四萬於新衛州遂渡河襲金主至歸德敗其兵於闕伯臺卽從速不台攻汴西門金元帥崔立降以功授總把從天澤屯太康復以下德安功爲千戶壬子送兵仗至和林改抄馬那顏初太祖征葱嶺以西各國惟北方阿速阿羅思欽察入版圖其西南五印度國隔以雪山太祖惟至北印度遇角端班師未遑南也及金國平定憲宗初始命皇弟旭烈大王西征五印度而侃副之癸丑至木乃奚國敵塹道置毒水中侃破其兵五萬下一百二十八城斬其將忽都荅爾及兀朱算端有乞都卜城在稽寒山上懸梯上下守以精兵矢石莫及六年丙辰築夾城圍之莫能克侃架礮攻之守將開門降侃遣往說兀魯算端來降其父

阿力據西城侃攻破之走據東城復攻破殺之丁巳正月  
至兀里城伏兵下令聞鉦聲則起敵兵果來伏發盡殺之  
海牙算端降又西至阿刺汀城卽唐時黑衣大食國破其  
游兵三萬禡撈荅算端降至北印度乞石彌部忽里算端  
降又西至報達國卽唐白衣大食國漢之安息國也地方  
八千里父子相傳四十二世勝兵數十萬侃兵至破其兵  
七萬屠西城又破其東城兩城間有大河侃預造浮梁以  
防其遁城破合里法算端登舟覩河有浮梁掘之乃自縛  
詣軍門降其將紆荅爾遁去侃追之至暮諸軍欲頓舍侃  
相地勢不聽又行十餘里乃止夜暴雨先所欲舍處水深  
數尺明日獲紆荅爾斬之拔三百餘城又西行三千里至  
天方國卽漢之條支國也其將住石致書請降諸將大喜



侃曰受降如受敵倘誤中彼計險莫大焉嚴備以待住石  
果設伏邀襲侃大破之巴爾算端降下其城百八十有五  
又西行四千里至密昔爾國卽唐之拂林國也旣偪敵止  
營夜忽拔隊銜枚西行十餘里而畱空帳幙於故地敵昏  
夜潛師來襲僅得空營殺數病卒可乃算端大驚曰東天  
將軍神人也遂降戊午旭烈命侃西渡海收富浪國侃喻  
以禍福兀都算端見侃驚曰吾昨所夢神人乃將軍也卽  
來降以上皆西印度境師還西南至石羅子國敵人來拒侃直出  
掠陳一鼓敗之換斯干阿荅畢算端降至賓鐵國侃以奇  
兵掩擊大敗之加葉算端降己未破兀林游兵四萬阿必  
丁算端大懼來降得城百有二十西南至乞里彎國忽都  
馬丁算端來降以上皆中印度境西域平侃以捷告至四川御營

會憲宗崩乃還鄧開屯田立保障世祖卽位侃疏請建國  
號築都城立省臺興學校等二十五事及平宋之策其略  
曰宋據東南以吳越爲家其要地則荆襄而已今日之計  
當先取襄陽旣克襄陽置彼揚廬諸城勿顧直趨臨安疾  
雷不及掩耳則江淮巴蜀不攻自平後皆如其策中統二  
年擢江漢大都督府理問官三年二月益都李壇及徐州  
總管李杲哥俱反宋夏貴復來犯邊史天澤薦侃召入見  
世祖問計所出曰羣盜竊發猶柙中虎內無資糧外無救  
援築城環之坐待其困計日可禽也帝然之賜尙衣弓矢  
馳至徐斬杲哥夏貴焚廬舍徙軍民南遁侃追貴過宿遷  
縣奪軍民萬餘而還賜金符爲徐邳二州總管杲哥之弟  
盧馬復與夏貴以兵三萬來寇邊侃破斬千餘級奪戰艦

二百至元二年有言當解藩鎮兵權者天澤遂遷他官侃亦調知滕州三年侃上言宋人羈留我使空輿師問罪淮北可立屯田三百六十所每屯置牛三百六十具計一屯所出足供軍旅一月之需帝以侃習於軍務擢爲萬戶從軍下襄陽由陽邏上流渡江江南平遷知寧海州居一年卒侃行軍有紀律野爨露宿雖風雨不入民舍所至興學課農吏民畏服焉

野里朮

昔里吉思

野里朮高昌人世居五城後徙京師父達釋有謀略爲國人所信服太祖西征高昌國主懼以錦衣白貂帽召達釋謀之達釋知天命有歸勸其主亦都護執贄稱臣以安其國由是號爲尙書太祖班師諸王言於帝曰達釋之子野

里朮驍勇善戰所將部落又強大聞其人每思效順前未  
有機便盍致之乎太祖是其議卽詔給驛馬五百迎與俱  
來旣見甚器重之己卯太祖西征回紇野里朮別從親王  
按只台戰敵有功甚見親遇王方以絳蓋障日而坐及聞  
野里朮議事稱善久之旣退徹其蓋送之十里遂得兼長  
四環衛之必闔赤壬辰從討金戰功稱取甲午副忽都虎  
籍漢戶口籌其賦役分諸功臣以地人服其敏野里朮長  
子鐵哥朮沈鷲有才漠北嘗有擁兵叛者鐵哥朮率族人  
與戰於魚兒濼時軍興簿檄繁急鐵哥朮一以其國書卽  
字識之無遺失者帝甚嘉焉至元中擢爲棣州達魯花赤  
遷德安府達魯花赤適土人禁知府者以眾叛鐵哥朮率  
眾先登冒矢石身被數槍猶戰不已遂討平之主將怒將

屠其城鐵哥朮請曰叛者蔡知府數人而已城中之人何預焉請止誅黨與毋濫及非辜主將嘉其誠懇城遂得全累官至婺州路達魯花赤所在有政績卒封榮國公諡簡

肅

舊以鐵哥朮立傳今改附其父

昔里吉思不知何部人幼從太祖征回回河西諸國俱有戰功太宗時從皇弟拖雷西征師次京兆府會亦來哈台率諸部兵作亂昔里吉思挺身斫賊陳下馬搏戰賊眾莫不披靡俄失所乘馬步走至皇弟軍中賊退皇弟嘉其勞妻以侍女世祖時其妻爲皇子乳母於是皇太后待以家人禮得同飲白馬湏國制白馬湏非宗戚貴胄不得飲也昔里吉思子塔出爲寶爾赤迭只帳殿千戶塔出子日千家奴曰撒里蠻千家奴從征乃顏力戰而死撒里蠻年十

六從世祖討阿里不哥戰於什門圖有功賜拔都號

元史卷二十四終

元史卷二十五

列傳十一

國相臣

耶律楚材

子鑄

粘合重山

耶律楚材字晉卿遼東丹王突欲八世孫

王子婁國爲燕京留守遂居燕

金尙書右丞履之子也右丞年六十始生楚材占之曰是誠偉器用於異國因取左氏楚材晉用之語爲名字生三歲而孤母楊氏教之學及長博極羣書文如宿構旁通天文地理律厯術數及釋老醫卜百家之說以西域厯五星密於中國乃作麻荅把厯蓋回回厯名也金貞祐初辟爲掾後燕京畱守辟爲左右司員外郎太祖定燕求遼宗室得楚材身長八尺脩髯過腹聲如洪鐘帝偉之曰遼金世讎朕爲汝雪之對曰臣父祖嘗委質事金旣爲臣子敢讎



君父邪帝重其言處之左右遂呼曰吾圖撒合里而不名  
蒙古語長髯人也歲己卯夏六月帝西討回鶻國禡旗之  
日雨雪三尺帝疑之楚材曰玄冥之氣見於盛夏克敵之  
徵也庚辰冬大雷復問之對曰回鶻國主當死中野後皆  
驗夏人常八斤善造弓見寵於帝每自矜曰國家方用武  
耶律儒者何用楚材曰治弓尚須用弓匠治天下者豈可  
不用天下匠邪帝聞之喜日見親用國初未有麻西域人  
奏五月望夜月當蝕楚材曰否卒不蝕明年十月楚材言  
月當蝕西域人曰不蝕至期果蝕八分帝曰人間事汝固  
應知天上事亦無不知邪壬午八月長星見西方楚材曰  
女真將易主矣明年金宣宗果殂帝每征討必命楚材卜  
帝亦白灼羊胛以相符應使駐尋思千城總司軍餉甲申

帝西征至北印度駐鐵門關有獸鹿形馬尾色綠而獨角

作人言謂侍衛者曰天道好生汝主宐早還帝即日班師

歸至尋思千城以問楚材對曰此角端獸也能言四方語

好生惡殺乃旄星之精此天降符以告陛下願止殺以承

天意帝納之舊史作東印度邊地尚未至中印度也安得

即謂東印度乎楚材畱守尋思千城在阿母河之北距鐵

門尚二千餘里未至北印度况東印度乎史但据宋子貞

神道碑歸功耶律而不知地里事實種種不符故知爲太

祖班師歸後始詢楚材也或又謂角端之獸不見書傳疑

楚材詭詞納諄案角端獸見上林賦獸則麒麟角端注引

郭璞云觴音端角在鼻上堪作弓似麒麟毛詩疏云麟黃

色角端有肉張揖云角端似牛堪以爲弓則亦

麟之屬此耶律之對所本洵哉大儒偉人乎

征西夏下靈武諸將爭取子女金帛楚材獨收遺書及大

黃藥材既而軍中病疫得大黃輒愈全活者萬人帝自經

營西土未暇定制州郡長吏生殺任情至孥人妻女取貨

財兼土田燕薊畱後長官石抹咸得布大帥石抹明安子也尤貪暴殺人盈市楚材聞之泣下卽入奏請禁州郡非奉璽書不得擅徵發囚當大辟者必待報違者罪死於是貪暴稍戢燕多劇賊未夕輒曳牛車指富家劫取財物不與則殺之時睿宗以皇子監國事聞遣中使偕楚材窮治得其姓名則皆畱後親屬及勢家子也盡捕下獄戮其首惡於市燕民始安己丑秋太宗將卽位擇期八月二十二日宗親咸會議猶未決太弟拖雷方監國問曰事猶未集別擇日可乎楚材曰過是無吉日矣遂定策立儀制乃告親王察合台曰王雖兄位則臣也禮當拜王拜則莫敢不拜及卽位王率皇族及臣僚拜帳下國朝尊屬行拜禮自此始中原甫定民多誤觸禁網而國法向無赦令至此獨

請肆宥且條便宜十有八事頒天下其略言州郡宜置長吏牧民設萬戶總軍使勢均力敵以遏驕橫中原之地財用所出宜存恤其民州縣非奉上命敢擅行科差者罪之賈易借貸官物者罪之蒙古回鶻河西諸人種地不納稅者死監主自盜官物者死應犯死罪者具由申奏待報然後行刑敢擅殺者死貢獻禮物爲害非輕盡宜禁斷帝悉從之初太祖之征西域也未暇經理中原官吏聚斂自私而倉庫無儲待羣言漢人無補於國可悉空其人爲牧地楚材曰陛下將南伐軍餉轉輸必取於中原誠均定中原地稅商稅鹽酒鐵冶山澤之利歲可得銀五十萬兩帛八萬匹粟四十餘萬石足以供給何謂無補帝曰卿試爲朕行之乃奏立燕京等十路課稅所使副悉用士人以陳時

可趙昉劉中等充之辛卯秋帝至雲中十路咸進廩籍及金帛陳於廷帝顧謂楚材曰卿之力也即日拜中書令事無鉅細皆先白之楚材舉鎮海粘合重山爲左右丞相凡州郡長吏及萬戶分掌文武毋得侵職及侵稅課之權權貴不能平燕京路長官石抹咸得布以舊怨譖於宗王使來奏楚材悉用南朝舊人恐有二心且以國朝所忌誣搆百端必欲置之死帝察其誣責宗王俄有訟咸得布不法者帝命楚材鞠之楚材爲緩其獄帝嘉其長者中貴可思不花奏采金銀役夫及種田西域與栽蒲萄戶帝令於西京宣德徙萬餘戶充之楚材曰先帝遺詔山後民質朴無異國人緩急可用不宜輕動今將征河南請無殘民以給此役且寶山後之地又請令蒙古回紇西域人等與所在

居民一體應賦役皆施行之壬辰春帝南征將涉河詔流  
民來降者免死或曰此輩急則降緩則走徒以資敵不可  
宥楚材請製旗數百以給降民使歸田里全活甚眾舊制  
凡攻城臨敵但以矢石相加者卽爲拒命旣克必屠之汴  
梁將下大將速不台遣使來請申前令楚材馳入奏曰將  
士暴露數十年所欲者土地人民耳得地無民將焉用之  
且奇巧之工厚藏之家文學之士皆萃於此若盡殺之將  
無所獲帝然之詔罪止完顏氏餘皆勿問時避兵居汴者  
得全活百四十七萬人其後伯顏下江南因以爲例楚材  
又奏擇儒釋道醫卜工匠散居河北官給廩贍又請遣使  
入城求孔子後奏襲封衍聖公付以林廟地命收太常禮  
樂生及召名儒梁陟王萬慶趙著等使直釋九經進講東

宮又率大臣子孫執經解義置編修所於燕京經籍所於平陽以開文治時河南初破俘獲甚眾軍還逃者十七八有旨容畱逃民及資給者滅其家鄉社亦連坐由是逃者莫敢舍多歿死道路楚材言河南既平民皆朝廷赤子走復何之柰何因一俘囚連死數十百人乎帝悟命除其禁金之亡也唯秦鞏二十餘州久未下楚材奏曰往年吾民逃罪或萃於此故以死拒戰若許以不殺將不攻自下詔下諸城皆降甲午議籍中原民大臣忽都虎等議以丁爲戶楚材曰不可丁逃則賦無所出當以戶定之爭之再三卒以戶定時將相大臣多所俘獲往往寄畱他郡楚材因括戶口竝出爲民容隱者死朝議欲遣回鶻人征江南漢人征西域以爲制御之計楚材極言其不可曰漢地西域

相去萬里未至敵境人馬疲乏兼水土異宜疾疫將生不若調近就征各從其便從之丙申春諸王大集帝親觴楚材曰非卿則中原無今日帝議裂州縣賜親王功臣楚材曰裂土恐致尾大分民將肆侵漁二者俱有敝不若朝廷置吏收其貢賦歲終頒之使毋擅科徵可也帝然其計遂定天下賦稅每二戶出絲一斤以給國用五戶出絲一斤以給諸王功臣湯沐之資地稅中田每畝二升又半上田三升下田二升水田每畝五升商稅三十分而一鹽價銀一兩四十斤既定常賦朝廷議爲太輕楚材曰作法於涼其敝猶奢後將日加則今已重矣時工匠制造糜費官物十私八九楚材請皆攷覈爲定制侍臣脫歡奏簡天下室女詔下楚材尼之不行帝怒楚材進曰向擇美女二十有



八人足備使令今復選拔臣恐擾民帝良久從之又欲收民牝馬楚材曰田蠶之地非馬所產今若行之後必爲人害又從之丁酉楚材奏言制器者必用良工守成者必用儒臣儒臣之事業非積數十年殆未易成也請校試其人然後官之乃命宣課使劉中楊奐隨郡攷試分經義詞賦論爲三科儒雖被俘爲奴者亦令就試其主匿弗遣者死得士凡四千三十人免爲奴者四之一先是州郡長吏多借西域賈人銀以償官息周年則倍之次年則并息又倍之謂之羊羔利往往破家不能償楚材奏前債悉以官銀代還凡七萬六千錠自後不以歲月遠近令本利相侔而止永爲定制至一衡量給符印立鈔法定均輸通驛傳庶政略備民稍蘇息焉有二道士爭訟誣其讎爲逃軍結中

貴虐殺之楚材接收中貴帝怒繫楚材既而自悔命釋之楚材不肯解縛進曰臣備位宰輔國政所屬陛下始以何故繫臣今又以何故釋臣宜明示百官豈可輕易反覆如戲小兒何以治天下帝曰朕一日萬幾寧無過舉今後有法令未便者卿其悉以告朕楚材因陳時務十策曰信賞罰正名分給俸祿官功臣攷殿取均科差選工匠務農桑定土貢制漕運皆見施行太原路轉運使呂振副使劉子振以贓抵罪帝責楚材曰卿言孔子之教可行儒者爲好人何故乃有此輩對曰聖人之名教有國家者莫不由之如天之有日月也豈得緣一夫之失使萬世常行之道獨見廢於我朝乎帝意乃解富人劉忽篤馬涉獵發丁劉廷玉等以銀百四十萬兩撲買天下課稅楚材曰此皆奸人

捐一償十使怨歸於上利歸於下心不可問宜重懲之乃已常曰興一利不如除一害生一事不如省一事今日以吾言爲平平他日方知吾言之不妄也太宗素嗜酒日與大臣酣飲楚材屢諫不聽乃持酒槽腐鐵以進曰麴蘖能腐物鐵尙如此況五臟乎帝悟語近臣曰汝曹愛君憂國之心豈有如吾圖撒合里者邪自庚寅定課稅格至甲午平河南歲有增羨至戊戌課銀增至百有十萬兩譯史安天合者諂事鎮海首引奧都刺合蠻撲買課稅又增至二百二十萬兩楚材極力辨諫至聲色俱厲言與涕俱帝曰爾又欲爲百姓哭邪姑令試行之楚材力不能止乃歎息曰民力從此困矣初太祖嘗指楚材示太宗曰此人天賜我家自後軍國庶政當悉委之太宗時西域諸國及宋高

麗使者來朝多夸其國所產帝指楚材示之曰汝國有此  
人否皆謝曰無有殆神人也帝曰朕亦度必無此人楚材  
嘗與諸王宴醉臥車中太宗臨平野見之直幸其營登車  
手撼之楚材熟睡未醒方怒其擾己忽開目視始知帝至  
驚起謝帝曰有酒獨醉不與朕同樂邪笑而去楚材不及  
冠帶馳詣行宮帝爲置酒極歡而罷楚材當國日久得祿  
分其親族未嘗私以官爵歲辛丑二月三日太宗疾篤用  
楚材言大赦而瘳冬復行獵楚材力諫不聽果以獵後飲  
酒感疾而崩語詳太宗本紀皇后乃馬貞氏稱制姦人奧  
魯刺合蠻用事庶政多紊賴楚材總持大綱不至決裂后  
以先朝舊勛深敬憚焉語詳定宗本紀甲辰夏五月卒年  
五十五皇后哀悼賻贈甚厚後有譖楚材在相位日久天

下貢賦半入其家者后命近臣麻里札覆視之唯琴玩十餘及古今書畫金石遺文數千卷而已至順元年贈經國議制寅亮佐運功臣太師上柱國追封廣寧王諡文正妻蘇氏爲宋蘇軾四世孫威州刺史弼之女有賢德生子二曰鉉曰鑄

鑄字成仲幼聰敏善屬文尤工騎射楚材卒嗣領中書省事時鑄年二十三上言宜疏禁網遂采歷代德政合時宜者八十一章以進戊午憲宗征蜀詔領侍衛驍果以從屢出奇計攻下城邑乙未憲宗崩阿里不哥叛鑄棄妻子自朔方來歸世祖嘉其忠賞賜優厚中統二年拜中書左丞相是年冬詔將兵備禦北邊後扈從敗阿里不哥於上都之北至元元年奏定法令三十七章吏民便之二年行省

山東未幾徵還初清廟雅樂止有登歌詔鑄製宮懸八佾之舞及成表上之賜名大成之樂十年平章軍國重事二十年坐事罷免沒其家貲之半徙居山後遂卒至順元年追贈懿寧王諡文忠子十一人希亮取有名詳叛王阿里不哥傳嘗諫征日本請雪冤獄寬盜鈔之令類次世祖嘉謨善政以進英宗取其書置禁中所著詩文及從軍紀行錄三十卷名懔軒集卒封漆水郡公諡忠嘉舊史希亮專傳今并附與楚材共相者一曰鎮海別見誓渾河功臣傳一曰粘合重山金源貴族以質子委質於太祖列宿衛從圍涼州執大旗指揮六軍手中流矢不動久官侍從數得侍內宴因諫曰臣聞天子以天下爲憂者未有不治忘憂天下未有能治者也置酒爲樂此忘憂之漸也帝深嘉納之太宗卽

位拜左丞相時耶律楚材爲右丞相凡建官立法多出楚材而重山佐成之七年從伐宋取江淮諸州邑降其民三十餘萬不戮一人復入中書視事未踰年卒追封魏國公諡忠武詔其子江淮安撫使南合嗣行軍前中書省事時大將察罕圍壽春七日始下欲屠其城以南合言而止嘗以李瓊坐制一方多詐必叛言於世祖中統三年遷秦蜀五路四川行中書省事其年李瓊果反益都明年授中書平章政事卒諡宣昭封爵如其父

楊惟中

楊惟中字彥誠弘州人金末以孤童子事太宗知讀書有膽略年二十奉命使西域三十餘國宣布威德俾皆籍戶口屬吏乃歸帝以爲可大用皇子闕出伐宋命惟中於軍

前行中書省事克宋棗陽光化等軍光隨郢復等州及襄陽德安府凡得名士數十人收伊洛諸書送燕都立宋大儒周惇頤祠建濂溪書院延儒士趙復王粹等講授其間慨然欲以道濟天下拜中書令太宗崩太后稱制惟中佐耶律楚材先後負任天下定宗卽位平陽道斷事官斜徹橫恣不法詔惟中宣慰按誅之金亡其將武仙潰於鄧州餘黨散入太原真定間據大明川用金開興年號眾至數萬剽掠數千里詔會諸道兵討之不克惟中仗節開諭降其渠帥餘黨悉平憲宗卽位世祖以太弟鎮金蓮川得開府專封拜乃立河南道經略司於汴梁奏趙璧惟中等爲使俾屯田唐鄧申裕嵩汝蔡息亳潁諸州初滅金時以萬戶劉福爲河南道總管福貪虐民受禍二十餘年惟中至



召福聽約束福稱疾不至連召之不得已始以數千人擁衛入見惟中手握大挺擊仆死之河南大治遷陝右四川宣撫使時諸軍帥橫侈病民惟中戮其尤者郭千戶以徇關中肅然歲己未太弟總統東師奏惟中爲江淮京湖南北路宣撫使俾建行臺蒙古漢軍諸帥竝聽節制師還卒於蔡州年五十五諡忠肅